

आकाशवाणी जयपुर-अजमेर

प्रादेशिक समाचार

दिनांक 03.11.2025

समय: 18.45 बजे

- जयपुर मांय आज व्ह्या एक सड़क हादसा रे कारण 14 जणां री मौत व्ही-मुख्यमंत्री भजनलाल शर्मा आला दर्जा रा अहलकारां री मीटिंग बुलाई।
- प्रधानमंत्री नरेन्द्र मोदी कह्यो-भारत दुनिया रो तीजो मोटो स्टार्टअप पारिस्थितिकी तंत्र बण्यो-देश मांय डीपटैक स्टार्टअप्स री तादाद 6 हजार ऊं बत्ती व्ही।
- प्रदेश मांय मतदाता सूचियां रा पुनरीक्षण कार्यक्रम रा तैत बी.एल.ओ. काल ऊं घर-घर जा र सर्वे करेला।
- राज्य मांय आज केई ठोडां मौसम बदल्यो।

000

जयपुर मांय हरमाड़ा हलका रा लोहा मंडी मांय आज दोपहरां पाछे तेजी ऊं जा रह्या डंपर रा ब्रेक फेल व्हे जावण रे कारण डंपर केई गाड़ियां ने टक्कर मार दीनी। ई हादसा रे कारण चौदह जणा री मौत व्हे गयी अर केई लोग ज़ख्मी व्हे ग्या। जयपुर पश्चिम रा पुलिस उपायुक्त हनुमान प्रसाद मीणा बतायो के पुलिस डंपर रा ड्राइवर ने हिरासत मांय ले र वां री स्वास्थ्य जांच करायी है। चिकित्सा मंत्री गजेंद्र सिंह खींवसर बतायो के ज़ख्मी लोगां ने तुरत पास रा कांवटिया अस्पताल पूगायी ज्या, जद के घणा ज़ख्मी पांच जणां ने सवाईमानसिंह अस्पताल मांय भेजी ज्या।

000

मौके मौजूद एक जणो बतायो के डंपर सब ऊं पैली एक कार ने टक्कर मारी, ज्यीं पाछे आगे दूजी गाड़ियां अर मिनखां ने रौंदतो थको निकळ ग्यो।

000

प्रधानमंत्री नरेन्द्र मोदी ई हादसा माथे दुख जतायो है। वे हादसा रे कारण मरण वाळां रा पिरवार वाळां ने प्रधानमंत्री राहत कोष ऊं 2-2 लाख रुप्या अर जख्मी व्ह्या लोगां ने 50-50 हजार रुप्या री मदद देवण रो ऐलाण कीनो। मुख्यमंत्री भजनलाल शर्मा ई हादसा माथे गहरा शोक जतायो अर अहलकारां ने ज़ख्मी लोगां रा बेहतर ईलाज रा हुकम दीना। उपमुख्यमंत्री दिया कुमारी अर चिकित्सा मंत्री गजेंद्र सिंह खींवसर ई हालात माथे निजर राख रह्या है। ई बीचे, प्रदेश मांय सड़क हादसां री बधती तादाद ने ध्यान राखता थकां मुख्यमंत्री भजन लाल शर्मा रो आज आला अहलकारां सागे मीटिंग करण रो कार्यक्रम है।

000

फलौदी मांय भारतमाला एक्सप्रेस-वे माथे काल सिंज्या व्ह्या हादसा पाछे आज परिवहन विभाग अर जिला प्रशासन गैर कानूनी ढाबा अर होटलां ने हटा दीनी अर नियम नी मानण वाळां रे खिलाफ करडी कार्रवाई करीजी। काल व्ह्या हादसा रो खास कारण एक्सप्रेस-वे री कोर माथे चलाया जा रह्या गैर कानूनी ढाबा अर होटल मानी ज्या है, जठे ट्रक नो-पार्किंग ज़ोन मांय ऊबा कर दिया जाता हा।

000

प्रधानमंत्री नरेन्द्र मोदी कह्यो है के भारत अब तकनीक रो ग्राहक नहीं बल्कि प्रौद्योगिकी मांय बदलाव री अगुवाई करण वाळो बण ग्यो है। वे आज नई दिल्ली मांय **उभरते विज्ञान तथा प्रौद्योगिकी नवाचार सम्मेलन 2025** रा उद्घाटन जळसा मांय बोल रह्या हा। प्रधानमंत्री कह्यो के दुनिया रो सब ऊं सफल डिजिटल सार्वजनिक बुनियादी ढांचो देश मांय ई बणायी ज्यो है।

000

प्रधानमंत्री कह्यो के सरकार देश मांय नवाचार रो नुवो तंत्र बणावण सारू अनुसंधान ने आसान बणावण माथे ध्यान दे रही है। श्री मोदी कह्यो के भारत दुनिया रो तीजो मोटो स्टार्टअप पारिस्थितिकी तंत्र बण ग्यो है। वे कह्यो के देश मांय डीपटैक स्टार्टअप री तादाद 6 हजार ने पार कर गयी है।

00000

सर्वोच्च न्यायालय आवारा कुत्तां रा मामला मांय सात नवम्बर ने फैसलो सुणावेला। सुप्रीम कोर्ट रा तीन जज न्यायमूर्ति विक्रम नाथ, संदीप मेहता अर एन.वी.अंजारिया री खंडपीठ कह्यो के मामला री सुणवाई रे दौरान घणखर राज्यां अर केन्द्र रा राज वाळा प्रदेशां रा मुख्य सचिव पीठ सामी पेश व्हा।

000

राज्यपाल हरिभाऊ बागडे आज जयपुर मांय अनाथ बच्चां सारु बणायी ज्या बाल आश्रम मांय बच्चां सागे बातचीत कीनी। वे बच्चां ने खूब पढाई करण अर लगातार आगे बढबा सारु मेहनत करण बाबत कह्यो। राज्यपाल कह्यो के बच्चा देश रो भविष्य व्हे है, ई कारण वां रा विकास रा बराबर मौकां सारु समाज ने सगळा जरूरी जतन करणा चाहिजे।

0000

भगवान बिरसा मुण्डा री डोढ सौ वीं जयंती रा सिलसिला मांय मनाया जा रह्या जनजातीय गौरव पखवाडा रा तैत राज्य रा न्यारा-न्यारा जिला मांय भांत-भांत रा कार्यक्रम राख्या जा रह्या है। डूंगरपुर मांय राज्य स्तर रो कला शिविर लगायी ज्यो जदके जयपुर अर भरतपुर री स्कूलां मांय विद्यार्थियां ने भगवान बिरसा मुण्डा रा काम रा बारा मांय जाणकारी दीरीजी अर भाषण, निबंध अर चित्रकला री होड़ां राखी ज्यी।

0000

मुख्यमंत्री भजनलाल शर्मा आज जयपुर मांय वां रा रेहवास माथे जनसुनवाई कीनी अर अहलकारां ने लोगां री परेशानियां आगी करण माथे ध्यान देवण सारु कह्यो। वे अहलकारां ने साफगोई अर जवाबदेही सागे काम करता थकां जनता री परेशानियां टेमसर निपटावण बाबत कह्यो।

0000

मुख्यमंत्री भजनलाल शर्मा राज्य री न्यारी-न्यारी कृषि उपज मंडियां मांय विकास रा कामां सारु 13 करोड़ 45 लाख रुपया ऊँ बत्ती रकम मंजूर कीनी है। ई रकम ऊँ श्रीगंगानगर जिला री अनुपगढ़, बीकानेर री पूगल रोड-अनाज मण्डी अर टोंक जिला री मालपुरा मंडियां मांय मंडी यार्ड बणावण, बिजळी ऊँ जुड़्या काम अर सड़कां बणावण रा काम करया जावेला। ई सागे ई सुमेरपुर री फल-तरकारी मंडी अर जयपुर कने बस्सी रा गौण मंडी यार्ड तूंगा मांय प्लॉट आवंटन री आरक्षित दर अर आवंटन री ई मंजूरी दे दीरीजी है।

000

राजस्थान समेत 12 राज्यां मांय काल ऊं वोटर लिस्टां रा विशेष गहन पुनरीक्षण-एसआईआर रो कार्यक्रम चलायो जावेला। 4 दिसंबर ताई चलाया जावण वाळा एसआईआर रा तैत बूथ लेवल अहलकार-बीएलओ घर-घर जा र सर्वे करेला। मुख्य निर्वाचन अधिकारी नवीन महाजन बतायो के 4 दिसंबर ताई राज्य रा सगळा बीएलओ मतदातावां रा घर पूग र वां ऊं 2 कॉपी मांय गणना प्रपत्र भरावेला। श्री महाजन बतायो के प्रदेश मांय मौजूदा साल री मतदाता सूची रे मुजब वोट देवण रा हकदार लोगां री तादाद 5 करोड़ 48 लाख 84 हजार 827 है। आं मांय 2 करोड़ 84 लाख पुरुष, 2 करोड़ 65 लाख महिलावां अर 681 दूजा मतदाता है। एसआईआर कार्यक्रम सारु आज बालोतरा जिला रा पचपदरा विधानसभा हलका मांय बूथ लेवल अहलकार-बीएलओ अर सुपरवाइजर ने सिखावण देवण रो कार्यक्रम राखी ज्यो। बीएलओ घर-घर जा र गणना प्रपत्र बांटेला, ज्यां मांय वोट देवण वाळा ने रंगीन फोटो लगा र जरूरी जानकारी देवणी व्हेला।

0000

पाली पुलिस ने गृह विभाग री ओर ऊं आज मोबाइल फोरेंसिक यूनिट वैन दीरीजी। ई वैन मांय 12 भांत रा किट है, ज्यां री मदद ऊं पुलिस मौके ई खून अर सीमेन रा नमूना, नारकोटिक्स, आंगळियां अर पगां री छाप सरीखा सबूत आसानी ऊं अर कम बगत मांय भेळा कर सकेला।

0000

केन्द्रीय जांच ब्यूरो- सीबीआई री ओर ऊं आज पाली रेलवे स्टेशन परिसर मांय जन जागरुकता शिविर लगायी ज्यो। ई मौके जनता ऊं बातचीत कर र केन्द्र सरकार रा दफतरां मांय घूसखोरी, गैर कानूनी फायदा री मांग अर बिना कारण लटकायोड़ा कामां ऊं जुड़ी शिकायतां दर्ज करी ज्यी। सीबीआई रा सब इंस्पेक्टर नित्यरंजन डे बतायो के शिविर रो मकसद भ्रष्टाचार निरोधक कानूनां रा बारा मांय जनता मांय जाग जगावणो अर शिकायतां माथे जरूरी कार्यवाही री कोशिश करणो है।

000

राज्य रा केई हलकां मांय आज मौसम रो मिजाज बदल ग्यो। चित्तौड़गढ़ मांय संवारे री पोर कोहरो रह्यो अर हलकी बरसात व्ही। पाली, जालौर अर बाड़मेर जिलां मांय दोपहरां पाछे बिरखा व्ही। किसान ई बिरखा ने सिंयाळू साखां री बुवाई सारु फायदेमंद मान रह्या है, हालांकि बाड़मेर मांय काटयोड़ी साखां ने नुकसाण रो अंदेशो है। म्हारा खबरनवीस बतायो के मौसम मांय बदलाव अर पारो उतरण ऊं ठण्ड महसूस व्हेवण लाग्यी है।

000

0000

राष्ट्र गीत 'वंदे मातरम्' रा डोढ सौ साल पूरा व्हेवण रा सिलसिला मांय 7 नवम्बर ऊं खास उत्सव मणायो जावेला। राज्य स्तर रो जळसो जयपुर रा सवाईमानसिंह स्टेडियम मांय राख्यो जावेला, जिण मांय स्कूल-कॉलेजां रा विद्यार्थियां, एनसीसी, एनएसएस अर दूजा सामाजिक संगठन शामिल व्हेला। उत्सव रे दौरान सामूहिक 'वंदे मातरम्' गायन, 50 हजार तिरंगा झंडा बांटण अर महापुरुषां ऊं जुडी प्रदर्शनी लगायी जावेला अर सामूहिक गायन, प्रभात फेरी अर खूनदान रा शिविर लगाया जावेला।

0000

डाक विभाग रा विशेष स्वच्छता अभियान रो पांचवों दौर पूरो व्हेग्यो है। दो ऊं 31 अक्टूबर ताई चलायी ज्या ई अभियान रा तैत संचार मंत्रालय 23 हजार वर्ग फुट ऊं बत्ती जगह खाली करवायी। ई दौरान डाक महकमा ने कबाड़ अर दूजी सामग्री री बिक्री ऊं 57 लाख रुपया ऊं बत्ती आमदनी व्ही।

000